

CODOSAS YACNOCQUIDON ISTE

1 ¹Pabado nebi. Nuquin Papa bunacpadomboen Esuquidistun ëbi chuibeneta caid nebi. Timoteyo ëbëdi iquec. Esuquidistu tantiaquid icsho nuqui con utsi caid aidi nec. ²Aidbëdtambi ënenquiocquin Esus tantiec Codosas yacno iccuededquido, Nuquin Papan cuënaido, Con utsibo nec, quequin mibitedi chuiquin dada uaimbique. Isec onqueta.

Esuquidistu tantiaquido icsho Nuquin Papan ëbi icsaid cuidenquiocquin ambi bëdambocquid icmebanaid nebi, quequin tantiec mibitedi Codosas yacnocquido adquiec ma mibi tabadpanuna. Adecbidi, Nuquin Papabëd icquido nebi, quequin tantiec ma tabadpanuna.

Nuquin Papa chuidoniaid

^{3,4}Nuquin Papa, Nuquin Icbo Esuquidistun Papa chiec nadec onquebi. Bëdambocquid icquin mibipadquiocnoc Codosas yacnocquido Esuquidistu tantiaquido bëdambocquido mimbi icmebanec, Papa. Utsibo Codosas yacnoësh choshon utsi-utsiec Esuquidistu tantiaquid yanosh. Adquid yanshun Esuquidistu tantiaquid utsibo bëdamboen tantiec, quequin chuisho tantiash bëdambo iquebi, Papa, quequin mibitedi tantiec Nuquin Papa chiec onquedenebi. ⁵Esuquidistu Nuquin Papa yacno yuedanquid nec, quequin, Nuquin Papan chiaid abimbo iquec, quequin

chuihanac abi tantiaquido mibitedi yanac. Adquid yanshun, Abi yacno Nuquin Papabëd bëdamboec tabadendabi, quequin aid ushë chote cainquidombo icquin Esuquidistu tantiaquid utsibo mibitedishun tantiec. ⁶Ëbi icsaid cuidtiadsëcquio Nuquin Papa icnubi utsibon Esuquidistu chuihanac abi tantiaquid ëbi yanacsho isash Nuquin Papa ëbi icsaid cuidenquio yec ënden bëpiscudac, quequin mibitedishun abimbo tantiashun mimbi bëdamboec tabadquin ismebanendac. Aden mibitedishun ismebanac utsin-utsinquien Esuquidistu tantiaquid yanshun abi bëdamboec tabadaid ademibidi ismebanoaic. Adoac nidaid utsin-utsinquieci tabadquidon Esuquidistu tantiashun adomboembidi ismebanoaic. ⁷Epapadasën Esuquidistu chuihanac Esuquidistu tantiaquid mibitedi yampondac. Codosas yacno nidtiapimbocquin ëmbi, Ambo nidshun Esuquidistu chuibanta, cac Epapadas nidondash. Aidi ëmbi chiacpadomboen ëbi nashunquidquio nec. ⁸Adquid yec mibi yacno nidshun chuihanash choashun, Nuquin Papan Mayanën pausunac utsi tantiaquid Codosas yacnocquido nec, quequin Epapadasën chioshi.

⁹Aden Epapadasën chiac mibi tantiec baded-badedquiec Nuquin Papa chiec onquian-onquianebi. Mimbi tantiacpadomboen min Mayanën

pausunacsho Codosas yacnocquido bēdamboen tantiamē, Papa, quequin chian-chianembi. ¹⁰Aden mibi bunacpaden mimbi tantiamiac Codosas yacnocquido, Esuquidistu tantiaquid nebi, quiaish utsibo ismenuēc bēdamboēc tabadec. Adec Codosas yacnocquido tabadsho isash, Bēdambo iquebi, ma Esuquidistu quepanuna. Adec bēdamboēc tabadquin nabanquidquio utsi iquendac. Adec tabadquido mibi tantiadonequido yanendac, Papa. ¹¹Adembidi mimbi dayacquio icmenucaid Codosas yacnocquido iquec natiatēquid icnuc aido chieshenquio yec abi tantiec mibi nidendac. Aden chieshenquiocnoc mimbi nidmiac, Bēdambo iquebi, Papa, quec, Cuishon, quec aido mibi chiec onquedenendac, Papa. ¹²Mimbi bēdambocquid icmebanac icsaquid nibēdacno mibi tantiaquid utsibobēd mibēdi tabadendabi, Papa, quequin tantiec, Bēdambo iquebi, quec ma Codosas yacnocquido mibi chiec onquepanuna, Papa.

¹³Ēnden adquidpenquio yec Satanasēn yuaido yec, Nuquin Papa tantianu, qesa nuqui iccondac. Aidēn yuaido icsho Nuquin Papan nuqui mēnchicpondash. Aden nuqui mēnchicquin abi cudasaidquio aton Madombo Esuquidistu icsaisapadquid nuqui icmenuēquin aidi Nuquin Papan nuqui tantiamēpondash. ¹⁴Abipadquid icmenuēc matses icsaid bedshunash abided cuidadec unēspanēdash. Adoacsho Esuquidistu tantiaquid icsho cuidenquio yec mibi icsaid bēpiscudendabi, quequin Nuquin Papan tantiampicpadquiequi bēpiscudendac.

**Abia yampidquio iquec abitedishun
icbombo Esuquidistu nec quiaid**

¹⁵Nuquin Papa isadesa icnubi abipadquidquibidi matsesash

Esuquidistu nuqui isendac. Abitedi uabi yec Esuquidistu aton Papabēdtsēqui Abia Yampid icquin utsi abitedi ambi uaid nec. Ambi uaidtedi aton na nec. Aidon icbo Esuquidistu nec. ¹⁶Nidaid abubēdtabi uashun aidēnquiocquidtedi uanu quequin ambi uaido nec. Matsesēn isaidtedi matsesēn isacmaidtedibēd Esuquidistun uampidquio nec. Mayantedi ambi uampidquibidi nec. Mayan utsi-utsiec chuiquid nebi, quenubi utsi-utsiec utsin icbo nebi, quepec. Adecbidi matses queoaindac. Aidotedi Esuquidistun uaido nec. Aidotedishun icbo Esuquidistu nec. ¹⁷Esuquidistu abia yampidquio iquec. Aidēmbi, Ēmbi uabanaido namebanu, quequin ambi chiacpadomboen namebanec. ¹⁸Nidaid utsi-utsiec yacnocquido abi tantiec iccuededquidtedi chuiquidquio Esuquidistu nec. Abitedi chuiquid icnu, quec Nuquin Papan Madombo Abia Yampid matsesash unēspanēdash. Adsho Nuquin Papan abia uincuemeshun abi tantiaquidtedi chuiquid abentsēcquibidi abipadquid icmepanēdash. ¹⁹Utsi abipadquid ictiapimbo iquec. Aidēn nabanacpaden natiapimbo utsi iquec. Ēbipadquidquio con mado nec, quiaish, Bēdambo iquebi, quec Nuquin Papa tsadec. ²⁰Aton Papapadquid icquin aton Papan tantiacpadomboen tantiaquid Esuquidistu nec. Adquid yec matses icsaid bedshunash ēbided cuidadec unēspebi, abi quiampicpaden matsesēn cuesten decatanac unēspanēdash. Adoacsho isun ambi bēdamboen istiapimbocboedi Esuquidistu tantiaquid yansho isun aidtedi Nuquin Papan bēdamboen isec.

²¹Ēnden Nuquin Papan matsespenquio mibitedi iccondac. Icsamboen tantiec icsaquid yec Nuquin Papa

chieshënquido mibitedi iccondac.

²²Adquid icboedi, Ēbi yacno yuednu quesun Esuquidistu tantiaquidotedi cuidenquio yec abi icsaid bēpiscudquin Esuquidistu icsaisapadquiocnoc aido isembi, quec Nuquin Papa tsadec.

²³Ēnenquiocquin Esuquidistu tantiaquid icsho abi yacno mibi yuedendac, quequin chuibansho mimbi tantiondac. Adenuidi ēnenquiocquin tantiata. Adomboen chuibenesho utsin-utsinquien tantiapondash. Esuquidistun, Aden chuibeneta, caid nebi.

**Esuquidistu tantiadoneta, quequin
Pabadon chuibanaid**

²⁴Ēbi tantiaquid Nuquin Papan bēdamboen isendac. Aden isac, Ēbēd icquido iquendac, quequin Esuquidistun ambia chuibansho matsesēn mēyampañēdash. Adomboembidi Esuquidistu chuibansho mēyamposhi. Adoqui, Cuishon, quebi. Ēnden abi tantiaquid yanacsho isun, Ēbi chuibeneta, quequin chuishumbic, Ēbi chuibansho mibi mēyante dadpen iquendac, quequin Esuquidistun chuiopondashi. Aden aidēn chiondacpaden mēyanaid nebi. Ma abi tantiaquid dadpen yanu quequin chuibenembi ambi tantiactedi mēyante yanuc. ²⁵Ai, Nuquin Papan, Esuquidistu ambi naidbēdta chuibeneta, caidquio nebi. Abi chuiquidquio nebi. ²⁶Nuquin Papan ambi tantiampicpaden chienquiocboed nēbi aid tantiamiac Esuquidistu tantiaquido yanec. ²⁷Aden Nuquin Papan isadaidbo utsi-utsien abia Esuquidistu tantiameshun isadaidpembotsen chuibeneta caid isadaidbo nec. Esuquidistu tantiaquido icsho isun, Con matses yec ēbi yacno ēbēdi tabadendac, quequin Nuquin Papan aton Mayan Esuquidistu

tantiaquid menec, quequin isadaidpembotsen chuibeneta caid nebi.

²⁸Aden ēbēdtan ēbipadquidon Esuquidistu chuibeniāc Esuquidistu tantiaquid yansho isash, Esuquidistu tantiec bēdamboec tabadteneta, quequin Nuquin Papan chiacpadomboen chuibenec nebi ma abi yacno chosho adquidquio Nuquin Papan yuedpanu quesun.

²⁹Badiadquidēn-badiadquidēnquien aton Mayanēn nadatiambocquin nac natiatequid icnuc ma Esuquidistu tantiadonequido mibitedi icpanu, quequin dayacquiocquin chuibenec nebi.

2 ¹Aden dayacquiocquin Nuquin Papa chuiquin mibitedi tantiembi. Adembi chuibanquin Daudiseya yacnocquido tantiembi. Adembi utsi-utsiec yacno iccuededquido ēbi isacmaidobi Nuquin Papa chuiquin tantiembi. ^{2,3}Esuquidistu tantiadonequido ma yampanueshun dayacquiocquin chuibenec nebi. Abentsēc yacnimboec tantiananquidquio ma yampanueshun dayacquiocquin chuibenec nebi. Adquidquio yanshun utsin abimbo chuisho tantiash, Abimbo chuiquid nec, quequin ma bēdamboen tantiapanuna. Adembi, abimbo chiacnimboen chuisho tantiashun, Icsamboen chiec, quequin ma tantiaquiopanuna. Nuquin Papan tantiamenquiocboed Esuquidistu nec, quequin tantiamequin ambi comapenen tantiacpadomboen pausunaid ma mibitedi icpanueshun dayacquiocquin chuibenec nebi. ⁴Comapenen tantiaquid icquin, Utsi tantiata, quequin Esuquidistupenquio chuisho ma tantienquio mibitedishun icpanu, quequin aden mibi tantiaquin chiec nebi. ⁵Mibēd icte bunquequi mibi yacno nidiapimbo yequi mibitedi

tantiec tsadtenebi. Adec tsadnubi,
 Esuquidistu tantiaquido yanshun
 ënëdenquio yec iccuededquin
 aiduidtsëqui tantiadonec, quequin mibi
 yacnoësh choquidon chuisho tantias
 bëdambo iquebi.

**Esuquidistu tantiaquid iquec utsin
 chiapaden naic abuc nidendabi,
 quequin tantienda.**

⁶Adebidi Esuquidistu tantiaquid yec
 abëd icquido iquec, Aidi con Icbo nec,
 quec ambi chiapadquiec tabadteneta.

⁷Adec tabadquin cuëte tapun
 uquëducquiocquidën cuëte uidënash
 canidoacbmboen Esuquidistu
 tantiaquid icquin tantiadonequiota.
 Aden Esuquidistu chuiquin
 ëbipadquidon mibitedi chuipondash.
 Aid tantiadonequid icquin, Mibi
 tantiaquiec bëdambo iquebi, quequin
 baded-badedquien Esuquidistu
 chuidoneta. ⁸Adembidi aid
 tantiadonequid icquin aid tantiesan
 ëndenquio ambembi chieci
 onquiampicpaden nëbi icquidën
 adomboembidi chuisho Nuquin Papan
 chiapadomboen chiesha nec, quequin
 tantiaquiota.

⁹Matsesash Nuquin
 Papapadquidquibidi Esuquidistu
 icpanëdash. ¹⁰Esuquidistubëd icquid
 icsho Nuquin Papan mibi adembidi
 abipadquid icmëbanec. Mayan
 chuiquidtedi chuiquidbidi mibëd icquid
 Esuquidistu nec. ¹¹Aidën, Èbëd icquid
 nec, quequin mimbi tantiaid icsa cuëte
 cuidi pateshuniacbmboen mibi
 ëmëbanec. Chështen tiacbmboen
 nainquiocquin bëdamboen tantiamequin
 aton Mayanën mibi icsaid ëmendac.
¹²Adembidi Esuquidistu unësacsho
 chococacbmboecnuc abi tantiaquid
 paucnu quiacbmboen acten mibitedi
 mentobanondash. Adembidi Nuquin

Papan Esuquidistu
 uincuenenëdacbmboecnuc icsaisa
 icmenu, quequin acten mentotanquin
 mibitedi cadobampondash.

¹³Ënden Nuquin Papan matsespenquio
 icquin mimbi tantiaid icsa icnuc
 unësacbmboec icquin Nuquin Papan
 ënden, Naden nata, quequin chiaid
 tantienquiocquin niacquido mibitedi
 iccondac. Adquid icboedi Esuquidistu
 tantiaquid icsho isash, Con madobëd
 icquido nec, quec Nuquin Papa nuqui
 icsaidtedi bëpiscudac. ¹⁴Ënden, Matses
 icsaid bëpiscudnu, quenuiocquin, ëmbi
 naden nata quequin chiaid niacquid
 comapenen cuidnu, quequin Nuquin
 Papan dada uampid iquec, quequin
 Esuquidistun icsainquiocquin ambi
 chiaidtedi nabampanëdash. Adquid
 icshobi icsaquidbmboecnuc matsesën
 unës uaquin cuesten dectanac matses
 icsaidtedi bedshunash abibi cuidadec
 unësapanëdash. Aid unëso isun, Matses
 icsaid cuidosh, quequin abi
 tantiaquidquio icsaid ambi naden nata
 quequin dada uamiaid ucacbmboen
 tantiec bëpiscudtenec Nuquin Papa.
¹⁵Esuquidistuidi Nuquin Papan naden
 nata quequin chiaid niaquesa yec
 matses icsaid bedshunash abided
 cuidadec unësash uincuenquin Nuquin
 Papan chiaid niacquido mayan icsabo
 dëniaquec Esuquidistu abitedi chuiquid
 yampanëdash. Aden dëniacshun,
 Nëidtedi ëbi tantiaquido chuiquid
 ictiapimbo iquec, quequin bedshun
 mëtaneshun buanacbmboen Nuquin
 Papa Esuquidistun ismëpanëdash.

¹⁶Aden chuiquid utsitedi dëniacquid
 Esuquidistu nec, quequin tantias,
 Nadquid peshun nadquid utsi acsho
 Nuquin Papan ëbi bëdamboen isec,
 quenda. Adembidi, Nëid ushëmbi abi
 tantiec iccuededsho isun Nuquin Papan
 ëbi bëdamboen isec, quenda. Adembidi,

ushë chuca choaid usudsho isec
 cuëdënsho Nuquin Papan ëbi
 bëdamboen isendac, quequin tantienda.
 Esuquidistuidi tantiaquidquio icsho
 Nuquin Papan ëbi bëdamboen isec,
 quequin tantiata. ¹⁷Matses icsaquid yec
 ambi naidënquio abembi bëndantiapimbo
 iquec, quequin tantiamenuequin Nuquin
 Papan ambi, Naden nata, quequin
 chiaid Moises menepampic. Ëmbi
 bëdamboen isaidquio matses bëdambo
 icmequid choendac, quequin tantiaquin
 ambi naden nata quequin chiaidba
 Moises menepampic. ¹⁸Esuquidistun
 bëdambo icmiaid nebi, qeshun utsi
 icsamboen chiec onquesho tantienda.
 Ambibi chiec onquesho tantiashun
 Esuquidistu tantesa uaindac. Adquidbëd
 Esuquidistu ictiapimbo iquendac.
 Adquidën, Mibi chuiquidpenquio nebi,
 qeshumbic ambia
 tantiaquidbimboecquin ambi tantiaid
 Nuquin Papan uaid mayan bëda mibi
 tantiamenuequin chuibansho
 tantienquiocquin nadota. ¿Tsuntsin mibi
 adquid icmepash? cata. Aden chiaquien,
 Ushquin adquid isombique. Chuinu.
 Tantia, quequin ambembi chiec
 onquesho tantienda. ¹⁹Adquidën
 Esuquidistu abi tantiaquidon icbombo
 nec, quequin tantienquio iquec.
 Adecbidi Nuquin Papan tantiacpadquiec
 Esuquidistu tantiaquid dadpen yanash
 aton utsibobëd tantiananec nashunanec
 aton icbopadquid yanec, quequin
 tantiesa adquid nendac.

²⁰Tantianu. Ëbi chui. ¿Atotsi quiash
 Esuquidistu tantiaquid yanash ëbi icsaid
 cuidnuec Esuquidistuded unësash
 uincuenacimboec bëdamboec tabadebi,
 qeshumbic, ²¹Nëid bedtemaid nec. Aid
 bedsho mayanën mibi cuidendac,
 quequin utsi chuisho mimbi tantiape?
 Adembidi ¿atotsieshun mimbi tantiaid
 icsa unësacsho chococabi yacimboen,

Nëid petemaid nec. Aid pesho mibi
 cuidendac, qesho mimbi tantiape?
 Aden Esuquidistu tantienquio
 icquidëmbimboen, Nëid mishtemaid
 nec. Aid misho mibi cuidendac, qesho
 mimbi tantiaptec. ²²Nadquid petemaid
 nec. Nadquid mishtemaid nec, quequin
 matsesën ambibi chuiquin tantiamete
 nec. Ambi petemaidbëdi ambi
 mishtemaid ënëndendac. ²³Matsesën
 bëdamboen tantiacbimboen chiaid
 aidtedi nec. Nëid ëmbi tantiaid nec,
 qeshun aid bëdamboen ismenuen
 naden nanuna, quequin matsesën chiec.
 Aden ambibi tantiashun, Naden nata,
 quequin mibi chuitiapimbo iquebi,
 qeshumbic namenuequin comapenen
 adquidën chuibanec. Adecbidi,
 Damëyamëdsho ëmbi tantiaidën ëbi
 bëdamboen istsiash, quequin ambibi
 tantiash damëyamëdec. Adec
 damëyamë-dashic abi bunaiduidi
 tantiaquin ambi inacmaid dadan
 isuidtiapimbo iquec. Adecbidi abi inesa
 chidon isuidtiapimbo iquec.

Bëdamboec tabadaid chiaid

3 ¹Esuquidistu tantiaquid yec abia
 uincuenenëdac abuc nidash
 Nuquin Papa yacno icsate bunquid
 nibëdacno tabadacpadquiec
 tabadteneta. Adec tabadec, Nuquin
 Papan dayunquio Esuquidistu tsadec
 bëdambo iquec, quequin abëd icte
 bunquin Esuquidistu tantiadonec
 tabadta. ²Abuc abëdi ëbi icnuc aton na
 con na iquendac, quequin tantiaquin
 nidaidënshun bednu, quequinuidi
 tantienda. ³Esuquidistu unësaid
 tantiaquin aidbëdtabi mibi icsaid
 chococashunacimboec icsatiapimbo
 yec nidaidën tabadta. Adecbidi
 Esuquidistu uincuenash abuc Nuquin
 Papa yacno nidash, Ëbi tantiaquidtedi
 bëdaidquio iquec. Aido ëbi

cudasaidquio nec, quequin aidën dayun uaid nuqui nec. ⁴Aidën padpidec choshon abi yacno buanac abipadquidquio bëdaidquio nuqui iquendac.

⁵Adec abi yacnoësh abëdi bëdaidquio iquendabi, quequin mibi icsaيتدi cuesun secacimboen ëmbanta. Ëmbi inacmaid chudnu, quenquiocquin ënta dadan. Adembidi, Èbi inesa chudmenu, quenquiocquin ënta chidon. Adembidi, Chudnu, quequinuidi tantiaid ënta dadan. Adembidi, Chudmenu, quequinuidi tantiaid ënta chidon. Adembidi mibi bunaid icsatedi ënta. Adembidi aton na daëdpactsëc icquidëmba ma bednu, quenquiocquin, Ëmbia bednu, quequin tantiaid ënta. Aden ënshun, aton na daëdpactsëc icquidëmba ma bednu, quequin tantiaquin abia bedmeta. Bednu, quequinuidi tantiaid Nuquin Papan uaidbimboecnuc matsesën ambibi nacenaid tantiacbimboecquid mibi bedte bunaid nendac. Mibi bunaiduidi tantiaquin mimbi Nuquin Papa tantiatipimbo iquec. ⁶Abi bunaid icsabëdta ambi tantiaid icsa ënesa icsho matsesën naid chuibante ushë choan adquidtedi Nuquin Papan comapenen cuidendac. ⁷Adquid icboedi ⁸nëbi adenquiocquin ënash bëdamboec tabadteneta. Adecbidi comapenec nëishboedi adenda. Adecbidi, cuesantiadquio yec nëishboedi adenda. Adembidi, utsi icsambo icmeboedëmbi adoenda. Adecbidi, utsi icsamboen chuiboedi adoenda. Adecbidi, tsienbëdta shui chedo chiec icsamboen tantiec onqueboedi adenda. ⁹Adecbidi, mua uanamboedi ënëdta. Adquid icboedëmbi icsactsëcquid niacbimboen mibi icsaid ënta. ¹⁰Min tantiate chuca uacbimboecnuc abi tantiadonequidquio icnuequin mibi tantiamequid

tantiaded-tantiadedta. ¹¹Adquid Nuquin Papan icmiac Esuquidistu tantiaquid utsibo naden mimbi tantienquio iquendac. Nëid isadaidbo nec. Nëidic isadaidpembo nec, quequin tantiesa mibi iquendac. Adecbidi, nëid shui dëbid dëtemequid nec. Nëid shui dëbid dëtemesa nec, quequin tantiesa mibi neoaic. Adecbidi, Nëid chotac nec. Nëidic mayu nec, quequin tantiesa mibi neoaic. Adecbidi, Nëid yua nec. Nëidic yuaquid nec, quequin tantiesa mibi neoaic. Adquid Esuquidistu tantiaquid icnuc abëd icquid aton matses nec. Abi tantiaquidtedi chuiquid dapa abentsëcquiobi Esuquidistu nec.

¹²Aden Nuquin Papan cuënaido yec ambi bëdamboquid icmebanaidobi abi cudasaido yec ambi tantiamiaid nebi, quiash bëdamboquid isadacbimboec nadece tabadteneta. Utsibo natiamiaid icsho isun bëdambo icmenuequin nashumbanta. Adecbidi, Mimbia bedan bedembi, quequid icta. Adecbidi, Mibia nashunu, quequid icta. Utsi icsaid ëmenuec comapenec chushquenquiocquin bëdamboen chuiban. Tantesa uasho isun ismeded-ismededta. ¹³Mimbi nacpadomboen utsibon natiapimbocsho isun, Padi, quenquiocquin abi tantiamewan. Adecbidi utsin mibi icsamboen nasho isash cuidnanenquio yec bëpiscudta. Nuquin Papa ëbi icsaid cuidenquio yec bëpiscudosh, quec adta. ¹⁴Adec tabadtenec tantiananta. Adec tantiananec Esuquidistubëd abentsëc yacbimboec icsaisa mibitedi yanendac.

¹⁵Adec Esuquidistubëd abentsëc yacbimboecnuc icmiaid nebi, quequin tantiec bëdamboec tabadtenenu, quec mibitedi tabadteneta. Adec tabadtenequin, Mibi bëdambo iquec, Papa, quequin chuideneta. ¹⁶Nuquin Papan Esuquidistu tantiadonemiaido

icta. Adquido yec abi tantiaquid utsibobëd Esuquidistu chuinanec, Bëdamboec tabadta, quec adqueiecbidi tabadec ismenanta. Aden naic chuiquid dapa Dabidën dada uampid sadmo caidbëdta cuëdënte utsi Nuquin Papan mibi bëdambo icmiaidbëdtabi ambi naid utsi chiec cuëdëncuededta. ¹⁷Adec tabadquin Esuquidistu tantiaquid nebi, quequin Esuquidistun chiacpadomboen nabanta. Adecbidi, ambi chiaiduidi chiec tabadteneta. Adec tabadquin, Esuquidistun tantiamiaid yec bëdambo iquebi, Papa, quequin Nuquin Papa chuideneta.

Aton shubun icquidbëd tabadaid

¹⁸Bëdamboec tabadnu, qeshun nadota. Chidon min bënën chiacpadomboen nabanta. Esuquidistu tantiaquid icquin adobanta.

¹⁹Chido inquidën, Con bënëbëd tabadec bëdambo iquebi, camenuen yuacimboecquin aid chuiquin min chido namenda. Mibibi tantiadquidui min chido namenda.

²⁰Bacuëbon, Esuquidistu tantiaquid icquin papan chiacpadomboen cacuidenquiocquin nabanta. Adembidi, titan chiacpadomboen nabanoata. Adosho isashien, Cuishon. Bëdambo iquebi, quependac Nuquin Papa.

²¹Anibëdtan min bacuëbo namenuec comapenen cuëdquin chieshmenda.

²²Yuan mibi yuaquidën chiacpadomboen nabanta. Aidën aden chuishun isnuc adobanta. Aden chuishun min icbon isenquiocnoc adomboembidi nabanta. Aden nabansho mibi bëdamboen isendac. Nuquin Icbo, Esuquidistu tantiaquid nebi, qeshun adobanta. ²³Con Icbo Esuquidistu nashunu, quiacimboen mibi yuaquidën chiacpadomboen chieshenquiocquin bëdamboen nabanta. ²⁴Con Icbo

Esuquidistun abi yacno ëbi nidacsho isun ëmbi bëdamboen nabanaid cuidquin ambi ismiambo yaid menendabi, quequin tantiaquin adobanta. Nidaidëshun abi nashunquid mibi neque. Adobanta. ²⁵Min icbon chiacpadomboen nata. Abi chieshënquid icbon cuidendac. Adembidi Nuquin Papan Esuquidistu tantiaquid nebi, qesho abi chieshënesa menequin bëdamboen cuidendac. Abi chieshënquid menenquiocquin comapenen cuidendac. Adenuidi tantiaquin cuidendac.

4 ¹Yuanquidën, mimbi yuaido ambi nabanacpaden bëdamboen menebanta. Abuc con Icbombo iquec, quequin tantiaquin mimbi yuaido bëdamboen menebanta.

Chuibanaid utsi

²Esuquidistu tantiaquid utsibo natiatequidbëd abi icsaid iquec, quequin tantiec baded-badedquie Nuquin Papa chiec onquedeneta. Aden chiec onquequin, Mimbi ëbi tantiaquin nabanaid tantiec bëdambo iquebi, Papa, quequin Nuquin Papa chuideneta.

³Adecbidi ëbipadquid utsibobëdta ëbi tantiec Nuquin Papa chiec onqueta. Mimbi chienquiocnëdaid Esuquidistu tantiate bunquid dadpen ma icpanuna, Papa, quequin Nuquin Papa chuideneta. Esuquidistun, Ëbi chuibeneta, cac aid chuibenesho bedshun mëtaniaid nebi.

⁴Pabado utsin onqueten onqesho cuembo chume, Papa, ma aidontsen tantiapanu, quequin Nuquin Papa chuideneta. ⁵Esuquidistu tantiesan ëbi tabadaid istenec, quequin tantiec bëdamboec tabadteneta. Adec tabadquin Esuquidistu tantiesatsen tantiamenuequin Esuquidistu chuideneta. ⁶¿Mitsicquid mimbi tantiaid icpec? quetsiash tanties. Adsho

tantiashun mibi onquiaidbëd sa
batambo iquec daëdacbimboecnuc
Esuquidistu mimbi tantiaid utsibo
chuita ma aidon tantiapanu qeshun.

Abëd icquid chuibanaid

⁷Nëbi ëbëd icquid utsi-utsien
chuibanu. Tantiata. Mibi yacno nidshun
Tiquicon ëbi tabadaid mibitedi
chiendac. Aid Esuquidistu
tantiaquidquio icsho ëmbi con utsi caid
nec. Aidi Nuquin Icho nashunquid
neaic. ⁸Ëbëd icquid utsibo naic
tabadaid mibitedi tantiamenuequin aidi
mibi yacno nidmembi. Adoac mibi
yacno nidash puduedshun ëbi naic
tabadaidbëdtabi Nuquin Papan chiaid
chuibanac mibitedi ëbi tantiec
unësqiucboedi cuishon queta.

⁹Onesimobëd Tiquico mibi yacno nidec.
Onesimo nuqui con utsi caidbidi nec.
Onesimo mibi yacnoshon tishaid nec.
Aidi chieshenquiocquin ëbi nashunquid
nec. Aid daëdshun ëbëd icquidon
nabamboed mibitedi chuibanendac.

¹⁰Nëbi mibi yacno nidesa chuinu.
Tantiata. Adistadico ëbëd icnuec
abembi quënë nauedadondaid nec.
Aidëmbi, Codosas yacnocquido tantiec
tsadebi, quequin chuisho tantiashun
dada uaimbi. Adomboembidi Madcosën
chiec. Madcos Bednaben utsi nec. Aidi
yuecash mibi yacno nidtsiash. Ambo
chosho isun yuedta. ¹¹Esus cashumbic
Ustus caidën, Codosas yacnocquido
tantiec tsadebi, quequin
chiacpadomboen dada uaimbi.
Adistadico yec Madcos yec Ustus yec
quec aidtedtsëqui isadaidbo nec. Aidon
ëbëdtambi Esuquidistu chuibanquin ëbi
bëdambo icmequido neaic. ¹²Epapadas
mibi yacnoshon tishaid Esuquidistu
chuibanquidquio nec. Aidëmbidi,
Codosas yacnocquido con utsibo tantiec
tsadebi, quequin chiacpadomboen dada

uaimbi. Icsamenuequid icnuc mibi
bunacpaden tantiadonemequin mimbi
Codosas yacnocquido abi tabadme,
Papa, quec
badiadquidën-badiadquidënquiec
Nuquin Papa chiec onquec Epapadas.
¹³Aidi mibi Codosas yacnocquido yec
Daudiseya yacnocquido yec Yedapodis
yacnocquido yec quequin tantiec
chieshenquio yec Esuquidistu
tantiadonequidombo ma icpanu quiash
mibitedi chiec onquedenec. ¹⁴Adembidi
Ducasën dauëchoquidën Demasbëdtan,
Codosas yacnocquido tantiec tabadebi,
quequin chiacpadomboen dada uaimbi.

¹⁵Codosas yacnocquidon nëid ëmbi
dada uaid mibitedishun isun, Pabado
mibitedi tantiec tsadec, quequin utsibo
chuita. Adomboembidi Daudiseya
yacnocquido chuioata. Adomboembidi
chido Nimpas cuëmëdquidën shubun
Esuquidistu tantiec iccuededquido
chuioata. ¹⁶Adembidi, nëid ëmbi dada
uaid isec onquequin mibëd
iccuededquido tantiameshun Daudiseya
yacno iccuededquido tsusiobo
menequin, Nëid Pabadon dada uaid isec
onquequin mibëd iccuededquido
tantiameoa, quequin chui. Adembidi
ëmbi Daudiseya yacnocquido tantiaquin
dada uaid bedshunshun isec onqueshun
mibëd iccuededquido tantiameoata.

¹⁷Adembidi Adquipo naden chuita.
Nuquin Icbon Esuquidistun
chiacpadomboen naimbudta, quequin
chuita.

¹⁸Mibitedi tantiaquin ëmbibi nëid
dada uaombique. Ëbi tantiec
nidtiapimbo yec Pabado quënë
tsadeque. Aid puduemeta, Papa,
quequin Nuquin Papa chiec
onquedeneta. Nuquin Papan ma
mibitedi bëdamboen ispanu, quec
tsadebi.

Padi. Aidedi dada uaombi.